



CONSULTA PREALABLA SUS ERA APROBACION D'UA ORDENANÇA

Nòm provisionau dera nòrma: ORDENANÇA REGULADORA DETH PRÈTZ PUBLIC ENTARA VENDA DE LIBRES, PUBLICACIONS E D'AUTI

Antecedents dera nòrma:

Eth Conselh Generau d'Aran dispause actuaument d'ua Ordenança reguladora deth prètz public de venda des libres propietat deth Conselh Generau d'Aran que se confeccionen e se venen des dera pròpria institucion, publicada en Bulletin Oficiau dera Província de Lhèida, numèro 194, deth 22 d'octobre de 2013.

Dempús de mès de dètz ans des dera sua aprobacion, aguesta ordenança ei desactualizada respècte ara activitat editoriau que desvolòpe actuaument eth Conselh Generau d'Aran e as besonhs de gestion derivadi dera comercializacion des sues publicacions. En particular, ei de besonh incorporar ua regulacion mès complèta sus era determinacion des prètzi publics, eth procediment de gestion e crubament, es bonificacions aplicables e era possibilitat de realizar era venda de publicacions a trauès de mieis electronics.

Per aguesti motius, se considèra convenient aprovar ua naua ordenança que substituísque ara vigenta, en tot adaptar-la ath marc normatiu e es besonhs actuaus deth Conselh Generau d'Aran.

PROBLÈMES QUE SE PRETENEN SOLUCIONAR DAMB ERA APROBACION D'AGUEST REGLAMENT.

Era Ordenança reguladora deth prètz public de venda des libres propietat deth Conselh Generau d'Aran que se confeccionen e se venen des dera pròpria institucion, publicada en Bulletin Oficiau dera Província de Lhèida, numèro 194, deth 22 d'octobre de 2013, ei desactualizada e actuaument non se compde damb es esturments de besonh entà establir es procediments de gestion e venda des publicacions editades pera institucion ne es critèris entara fixacion des prètzi publics d'aguesti materiaus.

Aguesta situacion impossibilita era comercializacion des libres e d'autres publicacions editades peth Conselh Generau d'Aran, en non dispausar d'un marc normatiu adaptat as besonhs actuaus gestion.

Auent en compde qu'es publicacions editades peth Conselh Generau d'Aran se realizen en aranés, aguesta situacion supause un obstacle entara promocion e difusion dera lengua pròpria d'Aran, dificultant qu'aguestes publicacions arriben ara poblacion e complisquen era sua finalitat de fomentar eth coneishement, er usatge e era normalizacion der aranés.

Era aprobacion d'aguesta ordenança permeterà establir eth regim juridic de besonh entara sua venda, facilitar era sua distribucion e contribuir ara preservacion, promocion e difusion dera lengua e cultura araneses.

BESONH E OPORTUNITAT DERA SUA APROBACION.



Era aprobacion dera ordenança ei de besonh entà regular un prètz public previst ena legislacion d'isendes locaux e establir eth regim juridic aplicable ara venda de libres, publicacions e d'auti materiaus editadi peth Conselh Generau d'Aran.

Atau madeish, permeterà fixar critèris objectius entara determinacion des prètz public, garantir era adequada cobertura des còsti derivadi dera edicion e distribucion des publicacions e milhorar era seguretat juridica autant entara Administracion com entàs personas qu'aquerissen es publicacions.

Era aprobacion d'aguesta norma tanben respon ath besonh d'adaptar era regulacion as naues formules de comercializacion, includint era venda a trauès des portaus web propietat deth Conselh Generau d'Aran e er usatge de mieis electronics entara gestion des vendes e era facturacion.

OBJECTIUS DERA ORDENANÇA.

Es principaus objectius dera ordenança son:

- Regular eth prètz public aplicable ara venda de libres, publicacions e d'auti materiaus editadi e comercializadi peth Conselh Generau d'Aran.
- Establir es critèris entara determinacion des prètz public, garantint que se fonamenten enes còsti associadi ara edicion, produccion, adquisicion e distribucion des publicacions.
- Regular es drets e obligacions des personas qu'aquerissen aquestes publicacions, atau coma es bonificacions que resulten dera aplicacion.
- Determinar eth procediment de gestion, crubament e, en sòn cas, recaptacion des prètz public.
- Dotar ath Conselh Generau d'Aran d'un marc normatiu actualizat qu'apòrte seguretat juridica ena gestion dera sua activitat editoriau.

POSSIBLES SOLUCIONS ALTERNATIVES REGULADORES E NON REGULADORES

Non se contemplen alternatives reguladores o non reguladores mès adequades entà arténher es objectius perseguits damb era aprobacion d'aguesta ordenança.

DATA FIN DERA CONSULTA PUBLICA

20 dies naturaus a compdar dera publicacion dera consulta ena sedença electronica deth Conselh Generau d'Aran.